

Ambasador Bercot razočaran još jednom opstrukcijom u ujedinjenju Mostara

Zamjenik Visokog predstavnika i šef Ureda OHR (Jug), ambasador Jean-Pierre Bercot, iznimno je razočaran činjenicom da Gradsko vijeće Mostara nije imalo dovoljno odgovornosti i političke mudrosti da na posljednjoj sjednici Vijeća napravi neke konkretne odlučne korake u ujedinjenju Mostara.

Naime, Gradsko vijeće je na toj sjednici trebalo stvoriti preduslove za osnivanje zajedničkog gradskog Preduzeća za čvrsti otpad u skladu s prijedlogom Svjetske banke. Svjetska banka je bila spremna da potpiše Aranžman o subsidijarnom kreditu za Mostar u iznosu od 2 plus 5 miliona dolara (2 za uspostavu regionalnog odlagališta za otpad i dodatnih 5 miliona od Global Environment Fund-a za čišćenje rijeke Neretve). Nažalost, prijedlog kojeg je na sjednici iznio gradonačelnik Jahić apsolutno je protivni prijedlogu Svjetske banke.

Ovo je vrlo štetno po cijeli grad, kako je to ambasador Bercot i naglasio gradonačelniku Jahiću par dana prije sjednice. Sada postoji istinska opasnost da se izgubi značajna pomoć Svjetske banke Mostaru te će, ako se to dogodi, građani Mostara za to morati pozvati na odgovornost one koji za to i jesu odgovorni.

Osim toga, vijećnici CD koalicije takođe su odbili usvajanje Tranzicijsko-poslovnog plana za mostarski Aerodrom. Ovaj bi Aerodrom sada trebao biti u potpunosti pod ingerencijom Gradske uprave nakon što su općine s hrvatskom većinom prenijele ovlasti na Grad. Tranzicijski plan je nužan jer bi SFOR do kraja godine trebao prenijeti ovlasti za kontrolu leta na domaće vlasti, naravno ukoliko one iskažu dovoljno interesa za funkcioniranje ovog Aerodroma.

Na kraju, ambasador Bercot bi želio podsjetiti političare da građani nisu izgovor za postojanje političara već da bi političari morali prvenstveno služiti interesima građana, što uopšte nije bio slučaj s posljednjom sjednicom Gradskog vijeća Mostara. Neshvatljivo je da neki mostarski političari imaju smjelosti sprečavati da građanima Mostara budu pružene kvalitetnije komunalne usluge, da se izgubi velikodušna ponuda Svjetske banke te da značajno pitanje mostarskog Aerodroma bude stavljeno na stranu. Ovo zasigurno nije stav koji može odvesti ovaj grad u Evropu.